



(khas bagi Majalah Qalam - tidak dibenarkan dikutip)

Peringatan:

Pertanyaan-pertanyaan yang tidak disertakan tanda tangan dan alamatnya yang terang tidak diraikan. Juga pertanyaan-pertanyaan yang mengenai di sekeliling hal ehwal masyarakat kita itulah yang diutamakan daripada soal yang sulit-sulit dan jarang berlaku oleh kerana ruangan ini adalah berguna juga untuk panduan pembaca-pembaca.

Bersimah

'Umar bin Husīn, Kampung Padang, Terengganu bertanya:

Sekumpulan orang nelayan membuat suatu pakatan menyembelih seekor atau beberapa ekor kerbau atau lembu di tepi pantai laut. Mereka itu mengambil serba sedikit daripada daging, tulang, hati, perut, kepala dan lain-lain anggotanya, sebahagiannya dibubuh di dalam sebuah perahu kecil lalu dihanyutkan ke laut dan yang bakinya ditaruh di atas batu-batu di tepi laut berhampiran dengan tempat menyimah itu. Upacara itu disudahi dengan permainan ronggeng, mak yong dan lain-lain permainan beberapa hari. Mereka percaya, dengan perbuatan itu mereka akan mendapat ikan. Istiadat tersebut memakan belanja sekurang-kurangnya empat ribu ringgit. Apakah hukumnya; kepercayaan dan sembelihan serta orang-orang yang membantu mereka dengan tenaga dan wang ringgitnya?

Jawab: Kepercayaan mereka adalah syirik semata-mata kerana rezeki itu Allah yang mengurniakannya, bukannya hantu penunggu laut. Tidakkah mereka membaca atau mendengar firman Allah taala:

"Hal min khāliqin ghairullāhi yarzuqukum min al-samā'i wal ard". (3, Faṭīr)

Ertinya: "Adakah siapa-siapa yang menjadikan makhluk, selain daripada Allah yang memberikan kamu rezeki dari langit dan bumi?"

Dan firman-Nya: "*Qāla ta 'ālū atumāḥarrama rabbikum 'alaykum*

illā tasharrakū shai' "

Ertinya: "Katakanlah! Marilah kamu aku bacakan apa-apa yang telah diharamkan Tuhan atas kamu, iaitu janganlah kamu berlaku syirik kepada-Nya dengan sesuatu juu pun".

Tentang sembelihan itu sudah tentu haram dan tidak ubahnya seperti perbuatan kaum Jahiliyah Arab yang menyembelih "Far'un" (anak unta sulung) dan "Afīrah" (unta persesembahan) kerana berhala dan hantu syaitan.

Orang-orang yang membantu mereka dengan tenaga dan wang ringgit sudah tentulah bersyubhat, lebih-lebih lagi apabila upacara itu disudahi dengan maksiat permainan ronggeng dan lain-lain dan membazirkan wang beribu-ribu ringgit pula.

Kaum Tua dan Kaum Muda

Zawāwī 'Alī, Maunah Imli Road Singapura bertanya: Apakah tafsiran yang sebenar berkenaan Kaum Tua dan Kaum Muda.

Jawab: Kaum Tua ialah gelaran orang-orang Islam kita yang berfaham sempit dan bertaklid buta kepada apa kata guru dan ulama sahaja berkenaan dengan perintah-perintah agama, hatta walau perkara itu bida'ah dan khurafat sekalipun.

"Kaum Muda" pula ialah gelaran orang-orang Islam kita yang berfaham maju. Tiap-tiap perintah agama, mereka ambil tahu asal puncanya, dan tidak mereka menerima melainkan yang berpunca daripada kitab Allah "al-Quran al-Karim" dan sunnah Rasul-Nya "al-Hadīth al-sharīf".

Menyanyi dan Bermain Muzik

S. Abdul Aziz, Jalan Tok Samian Kota Bharu, Kelantan, bertanya: Menyanyi dan bermain muzik adakah terlarang di dalam Islam?

Jawab: menyanyi dan bermain muzik tidak terlarang, kalau nyanyi itu bersih daripada kata-kata yang kurang sopan, dan kalau majlis itu tidak bercampur gaul lelaki perempuan, tidak menjadi majlis arak, atau majlis tari-menari yang ditegah oleh syara' (disebabkan ada penari-penari perempuan yang membuka aurat atau memakai pakaian lelaki, atau penari-penari lelaki berlaku sebaliknya).

Pendidikan menyanyi dan bermain muzik tidak terlarang dengan syarat tidak bercampur dengan sebarang maksiat atau melalaikan daripada sembahyang.

Islam tidak melarang hiburan yang bersih. Bahkan Islam bukan agama sedih dan duka nestapa! Hiburan yang sederhana pernah berlaku di rumah Rasulullah sendiri, dan pernah kejadian di majlis-majlis kahwin di bandar Madinah semasa Nabi hidup dan kemudian daripada wafatnya.

Seorang jariah telah bernazar, kalau Tuhan selamatkan Rasulullah (SAW) balik dari medan perang maka ia akan menyanyi dan memukul rebana di rumah baginda setelah Rasulullah balik dengan selamatnya maka jariah itu telah datang hendak menyempurnakan nazarnya. Saidatinā 'Aishah telah menyampaikan perkara itu kepada baginda dan baginda telah membenarkan kehendak jariah itu.

Peristiwa ini telah disaksikan oleh baginda dengan sahabatnya Abū Bakr al-Ṣiddīq.

Pada kali yang lain pula, tatkala Saidatinā 'Aishah mengahwinkan seorang jariahnya dan dalam masa pengantin perempuan itu dihantarkan pergi bertandang ke rumah pengantin lelaki, Rasulullah telah mencadangkan kepada 'Aishah, sabdanya yang bermaksud: “Aishah, tidakkah elok kalau

di antara orang-orang yang menghantar pengantin itu ada orang yang pandai menyanyi, kerana kaum Ansar (pihak pengantin lelaki) suka kepada nyanyian.”

Rasulullah (SAW) juga pernah memuji suara Abū Mūsā al-Ash'arī dengan sabdanya: “*Laqad a'tā mazmārā min mazāmīr Āl Dāūd*”. Ertinya: sesungguhnya dia (Abu Musa) telah beroleh serunai dari serunai-serunai keluarga Nabi Daud” yakni Abū Musā sangatlah merdu suaranya.

Baginda sendiri pernah membaca Quran dengan suara yang merdu dan telah membenarkan Bilal (tukang bangnya) azan pada tiap-tiap waktu dengan suaranya yang amat merdu itu.

Jaminan di Akhirat

Muhammad Shahīd bin Haji Šaleh, Bagan Datoh, Perak, bertanya: Adakah lain daripada agama Islam yang boleh menjamin kita di akhirat kelak, supaya kita terlepas daripada azab neraka?

Jawab: Kita sangat menyesal bagaimana seorang Muslim boleh menaruh syak wasangka kepada agama yang dipeluknya itu sedang Tuhan telah menerangkan perkara ini dengan tegas:

“*Wa man yabtaghi ghayra al-Islām dīnā falān yuqbalu minhu, wa huwa fī al-akhirati min al-khāsirīn*”. 85, Āli 'Imrān.

Ertinya: “Barang siapa memilih agama selain daripada agama Islam, maka tiadalah sekali-kali akan diterima daripadanya, dan ia pada hari akhirat daripada orang-orang yang rugi serugi-ruginya.”

Dalam pada itu sayogia diketahui, memeluk agama Islam sahaja dengan tidak mengerjakan perintahnya dan meninggalkan larangannya, tidak akan menjadi jaminan. Yang menjadi jaminan pada hari akhirat yang banyak pancaroba dan banyak ujiannya itu ialah “amal soleh” – teman setia yang tidak akan membiarkan kita keseorangan, hatta di liang kubur sekalipun.

Berguru kepada Kitab

Selāmat bin al-Hāj 'Abdūl Rahīm, Geylang Serai, Singapura, bertanya: Sakhah atau tidak jika saya berguru kepada kitab-kitab agama atau majalah-majalah agama – seperti majalah Qalam ini – dalam masalah-masalah agama?

Jawab: Sah sekiranya tuan seorang yang cerdik dan pandai membaca, dan pada waktu kecil pula ada bersekolah agama atau pernah belajar agama kepada tuan guru, kerana pada zaman ini banyak pengetahuan yang berat-berat dan bahasa-bahasa asing telah dipelajari orang dengan jalan pos yakni dengan jalan surat-menjurut.

Tetapi sekiranya kepandaian tuan tentang baca membaca lemah, yakni hanya boleh membaca dengan merangkak – lain kata surat, lain kata tuan, dalam masa kecil pula tidak pernah bersekolah agama dan dalam masa muda tidak pernah mengadap guru, maka berguru kepada kitab atau majalah sangatlah besar bahayanya dan wajiblah tuan menuntut kepada guru yang sanggup memberi penjelasan berkenaan ibadat dengan alasan-alasan yang berpunca dari kitab Allah dan hadith nabi-Nya!

Masalah Taklid

M.S. Ḥelmi, Kampung Bukit Sungai Pari Siam, bertanya: Hujah-hujah yang melarang taklid, yang terdiri daripada nas-nas Quran, Hadis, perkataan sahabat dan imam-imam mazhab sebagaimana yang dikumpulkan oleh “Zabha” dari majlis muzakarah Pulau Pinang dan disiarkan di dalam akhbarnya adakah sahih atau tidak? Kenapakah ulama seperti Persatuan Islam Se-Malaya tidak huraikan seperti itu?

Jawab: Hujah-hujah yang melarang taklid sebagaimana yang saudara sebutkan itu tentulah sahih dan itulah dia ajaran Islam yang sejati. Tentang mengapa kebanyakan

Ulama terutama dari “Persatuan Islam se-Malaya” tidak huraikan seperti itu, kerana mereka sebagaimana

yang diketahui ialah ulama taklid yang tidak sanggup bersusah payah mencari punca sesuatu hukum, malah berpada dengan bertaklid kepada ulama-ulama besar dan kalau memeriksa pun setinggi-tingginya di dalam kitab-kitab Ibnu Ḥajar dan Ramlī.

Sembilan Raja – Sembilan Menterinya

'Abdūl Mu'īn Abdūl Karīm, Bagan Datoh, Perak, bertanya: Apa kata penduduk negeri-negeri luar sekiranya mereka mengetahui bahawa Malaya mempunyai sembilan raja dan sembilan menterinya. Adakah bandingannya di dunia ini sebuah negeri sebagai Malaya yang demikian kecilnya mempunyai begitu banyak raja-raja?

Jawab: Tidak bertolok banding. Penduduk negeri-negeri asing sekiranya mengetahui hal ini, tidak akan berkata apa-apa, paling tinggi akan tersenyum kambing mendengarnya, sementelah pula soal ini ialah soal penduduk Malaya bukan soal mereka, rakyat Malayalah yang berhak menentukannya.

Sudah terbit!

Buku idaman tuan-tuan!

Pustaka Mahasiswa mempersembahkan kepada

Persuratan Melayu Buku

“Menuju Revolusi Islam”

Memberi kupasan yang hebat erti kerajaan Islam, dan merancangkan pelan menuju pembangunannya dengan bersandarkan hakikat-hakikat sejarah revolusi dan berpandukan perjuangan suci Rasulullah SAW. Karangan seorang jaguh Islam yang terkenal di Pakistan.

Harga sebuah \$1.20 pos 10 sen. Pintalah kepada:

Al-Haj Dawūd al-Āḥmadī

581 Jalan Tengku Putra Samaran, Kota Baharu

Pencetak dan pembahagi tunggal.